

INATSIARTUT
OMBUDSMANDIATA
2017-IMI
UKIUMOORTUMIK
NALUNAARUTAA



5.2 Meerarsiamik angerlartitsineq. Suliamik paasissutissartalersuineq. Allattuisussaataaneq

A-p aamma B-p meerarsiamik K1 Kommunimit angerlartinneqarnera Ombudsmandimut naammagittaalliuutigaat.

Meerarsiap angerlartinneqarnissaanik aalajangiinnginnermini suliamik oqartussaasut paasissutissanik pisariaqartunik pissarsinermikkut naammattunik tunngavissaqarnissaannik piumasagaat tunngavigalugu K1 Kommunip naammattunik paasissutissartalersuisimanginnera Ombudsmandip isorisarialerujussuartut isigaa.

*K1 Kommunip meerarsiaq angerlartinneqassasoq aalajangiinnginnermini meeqqanik inuusuttunillu ikiorsiisarneq pillugu Inatsisartut peqqussutaanni nr. 1-imi, 15. april 2003-meersumi kingusinnerusukkat allannguuteqartinneqarsimasumi (matuma kingornatigut meeqqat inuusuttullu pillugit peqqussummik taaneqartartussami) § 28, imm. 1 tunngavigalugu piumasagaatigineqartutut tullerinneri malillugit angajoqqaarsianik kommunimillu uninngavigisamik oqaaseqaateqartitsisimanginnera taamatuttaarlu isumaginninnermik ingerlatsiviup angerlartit-
tisoqarnissaanik isumaginninnermi ataatsimiititaliap siulittaasuanut inassuteqaammi taamatut pisussaaffeqarnermik maluginneqqusisimanginnera Ombudsmandip aamma isorisarialerujussuartut isigaa.*

K1 Kommunip 22. januar 2016-imi naammagittaalliortut kommunitut uninngavigisaannik ataatsimeeqateqarneq pillugu ingerlatsinermi ileqqorissaarneq naapertorlugu imaqarniliorsimanginnera Ombudsmandip ajuusaarnartutut isigaa.

Taamaattumik Ombudsmandip K1 Kommuni qinnuigaa oqaaseqaatip kommuni sunik isumaliutersuuteqarnissaanut pissutissaqalersinneraa nalunaarutigeqqullugu, matumani suliat siunissami angerlartitsinernut tunngasut ilanngullugit eqqarsaatigalugit. (Oqaaseqaat 11. april 2017-imeersoq, 2016-142-0014-istik j. normoqartoq).

Suliami pineqartut kikkussusiisa ilisarnarunnaarsinneqarnerini taaguutit uku a-torneqarput:

P: Meerarsiaq

M: Meerarsiap anaanavia

A aamma B: Angajoqqaarsiat

K1 Kommuni: Kommuni angerlartitsisoqarnissaanik aalajangiisoq

K2 Kommuni: Angajoqqaarsiaasut najugarivitatut kommuniat

Illoqarfik K1-imiittoq: K1 Kommunimi illoqarfik

Illoqarfik K2-miittoq: K2 Kommunimi illoqarfik

Suliap ingerlasimanerata allaaserineqarnera oqaaseqaammi innersuussutigineqartartoq matumani ilanngunneqanngilaq.

Meerarsiaminnik P-mik K1 Kommunip angerlartitsinera A-p aamma B-p allakkatigut 29. februar 2016-imeersutigut ilanngussartalitsigut uannut naammagittaalliutigaat.

P illoqarfimmi K1-imiittumi M-ip ...-mi panissaaraa. A aamma B-kkut illoqarfimmi K2-miittut paarsaqarnissamut akuersissummik K2 Kommunimit 16. februar 2011-mi tunineqarput, P-lu taakkunani inissinneqarluni, meeravissiar-tarineqarnissaa siunertaralugu. Anaanaviusulli M-ip meeravissianngortitsineq peqqissimissutigaa. K1 Kommunip P tamatuma kingornatigut angajoqqaatut oqartussaassuseqartoq akuersiteqqaarnagu inissippaa, A aamma B-kkut nalinginnaasumik paarsassaattut. Angajoqqaarsiat P-p pinngitsaaliinikkut meeravissianngortinneqarnissaa tamatuma kingornatigut qinnuteqaatigaat, itigartinneqarlutili. Inissiineq M-ip 11. september 2013-imi akueraa. P tamatuma kingornatigut A aamma B-kkunni nalinginnaasumik paarsarineqartutut inissisimaannarpoq.

P pingasunik ukioqangajalersoq inunngornerata kingornatigut M-ip siullermik attaveqarfigaa.

M-ip P angajoqqaarsiaani 2015-imi julimi illoqarfimmi K2-miittumi tikeraarppaa. P-p angerlartinneqarnissaa M-ip tikeraarnermi kingornatigut K1 Kommunimut allakkatigut 20. juli 2015-imeersutigut qinnutigaa. P angajoqqaarsiaminit naammattumik isumagineqarner-soq nalornissutigalugu isumakuluutigigini M-ip tamatumunnga peqatigitillugu oqaatigaa.

K2 Kommuni angajoqqaarsiat illoqarfimmi K2-miittut angerlarsimaffiannut tamanna tunngavigalugu misissuiartorluni 2015-imi septemberimi pulaarpoq. Kommuni naliliivoq pulaarnermi uparuagassaqaangitsoq.

P-p angerlartinneqarnissaa pillugu iliuusissanut pilersaarut K1 Kommunip 19. oktober 2015-imi suliaraa. Angerlartitsisoqarnissaa anguniarlugu suliniuteqarnissamik aalajangiisoqarsimanera K2 Kommunip angajoqqaarsiat angerlarsimaffiannut aqaguani pulaarnermi ilisimatitsissutigaa. P-p M-illu P-p angerlartinneqarnissaata oqilisaavigineqarnissaa siunertaralugu qanoq iliornikkut qaninnerusumik attaveqatigiilersinneqarsinnaanerat pulaarnermi ilaatigut oqaloqatigiissutigineqarpoq.

P kisimiilluni M-imi illoqarfimmi K1-imiittumi 28. december 2015-imit 8. januar 2016-imut feriassasooq K2 Kommunip angajoqqaarsianut 21. december 2015-imi paasissutissiissutigaa.

M 28. december 2015-imi illoqarfimmut K2-miittuliarpooq, P aallugu. Ulloq taanna marluullutik illoqarfimmut K1-imiittumut uterput. Tamatuma kingornatigut M P-p angajoqqaarsiaanut illoqarfimmi K2-miittunut 8. januar 2016-imi uternerani ingiaqatigissagaa pilersaarutigineqarpoq.

K1 Kommuni M-ip saaffiginnissuteqarneratigut M-ip angerlarsimaffianut 5. januar 2016-imi pulaarpoq. P angajoqqaarsiaminit naammattumik isumagineqarnersoq nalornissutigalugu isumakuluutigigini M-ip oqaatigaa. P-p M-imi illoqarfimmi K1-miittumiinnera sivitsorniarlugu K1 Kommuni aalajangerpoq, K2 Kommunilu oqarasuaatikkut iluatsinngitsumik attaveqarfiginiaraluareerlugu e-mailikkut 6. januar 2016-imeersukkut tamatuminnga ilisimatillugu. K2 Kommunip tamanna angajoqqaarsianut 7. januar 2016-imi ilisimatitsissutigaa.

P illoqarfimmi K2-miittumi angajoqqaarsiaminut uteqqinngilaq, tassami K1 Kommuni aalajangiimmat sivitsukkamik feriarnermini M-imut angerlartinneqartoq.

K1 Kommuni tamatuma kingornatigut 19. januar 2016-imi aalajangiivoq P aamma M piffissami 15. februar 2016-imit 22. februar 2016-imut illoqarfimmut K2-miittuliassasut, P-p angajoqqaarsiani meeqqerivimmiittarfinilu inuulluaqqusinnaaniassammagit. K1 Kommunip tamanna K2 Kommunimut oqarasuaatikkut 22. januar 2016-imi ataatsimiinnermi ilisimatitsissutigaa. K2 Kommunip K1 Kommunimik oqarasuaatikkut ataatsimeeqateqarnermi oqaatigineqartunik paatsuuineq pissutigalugu angajoqqaarsiat 26. januar 2016-imi ilisimatippai P anga-

joqqaarsianut uteqqaarallassasoq, angerlartitsinissarlu tamatuma kingornatigut pilersaarusioneqassasoq. P-p angerlartinneqarnissaanik K1 Kommunip aalajangiineranik angajoqqaarsianut ilisimatitsissunni K2 Kommunip 4. februar 2016-imi naqqippaa. P-p angerlartinneqarnerata siuartinneqarnissaanut tunngavilersuunni K1 Kommunip angajoqqaarsianut 12. februar 2016-imi nammineq aammattaaq ilisimatitsissutigaa.

P-p M-illu 2016-imi februarimi illoqarfimmi K2-miinneranni K1 Kommunip, K2 Kommunip, angajoqqaarsiaasimasut M-illu ullut 14-ikkaarlugit oqarasuaatikku attaveqatigiittoqartarnissaa isumaqatigiissutigaa, tassanilu A aamma B-kkut P-lu oqarasuaatikku oqaloqatigiittarsinnaassallutik.

A aamma B-kkut tamatuma kingornatigut uannut allakkatigut 29. februar 2016-imeersutigut ilanngussartalitsigut naammagittaalliorput. P-p angerlartinneqarnera angerlartitsinerullu meeqqamut pitsaanerususaaq isiginiarnagu kukkusumik pisananera aappariit taakkua naammagittaalliuutigaat.

Ombudsmandip misissuineranik naammagittaalliuut tunngavigalugu aallartitsiniarlunga aalajangerpunga.

Tamatuma kingornatigut imaattumik oqaaseqaateqarpunga:

“1. Misissuinerma killissalersorneqarnera

A aamma B-kkut meerarsiaminnik K1 Kommunip angerlartitsinera uannut naammagittaalliuutigaat, matumani kommunip angerlartitsinissamik aalajangiinninnermi angajoqqaarsiat isumaannik tusarniaasimanninnera kiisalu kommunip angerlartitsinermini meeqqamut pitsaanerusussamik pisariaqarneratut annertutigisumik isiginninniarsimanninnera ilanngullugit eqqarsaatigalugit.

Misissuinerma K1 Kommunip angajoqqaarsiat eqqarsaatigalugit suliamik suliarinninnera inatsiseqartitsineq atuuttoq tunngavigalugu ilumut pisimasutut isigisariaqarnerasoq apeqqummik misissuineq ilaasussannorlugu Inatsisartut Ombudsmandiat pillugu Inatsisartut inatsisaanni nr. 8-mi, 3. december 2009-meersumi § 14, imm. 1 tunngavigalugu killissalerpara.

Oqaatigaara K1 Kommuni ilaqutariinni paarsassatut inissiinerup unitsinneqarnissaanik P-illu angerlartinneqarnissaanik aalajangiinninnermini pissutsinik anaanaviusup atugaanik ilumut misissuisimanersoq isummerfiginngikkiga.

Oqartussaasut paasissutissanik pisariaqartunik pissarsinermikkut naammattumik tunngavissaqartussaanerat aamma ingerlatsinermi oqartussaasup suliamik paasissutissartalersuina pillugu piumasaqaatit tulliuuttumi ataatsimut allaase-raakka. K1 Kommuniip P angerlartinneqassasoq aalajangiinnermini suliamik paasissutissartalersuina tamatumunnga uiggiullugu isummerfigaara (immikkoortumi 2-mi). Kommuniip meeraq ilaqutariinni paarsatut inissimajunnaasasoq aalajangiinnginnerani oqaaseqaatinik inatsit tunngavigalugu pissarsini-artarnissaanik piumasaqaat tamatuma kingornatigut iserfigaara. K1 Kommuniip oqaaseqaatinik pissarsiniarsimannginnera tamatumunnga uiggiullugu isummerfigaara (immikkoortumi 3-mi). Angajoqqaarsianik ilisimatitsineq pillugu arlalinnik naatsunik tamatuma kingornatigut oqaaseqaateqarpunga (immikkoortumi 4-mi), suliarlu pillugu naatsumik eqikkaallunga naggasiillunga (immikkoortumi 5-imi).

2. Oqartussaasut paasissutissanik pisariaqartunik tunngavissaqartussaanerat

2.1. Malittarisassatigut tunngavigisaq

Oqartussaasut paasissutissanik pisariaqartunik tunngavissaqartussaanerat ingerlatsineq pillugu inatsiseqartitsinermi tunngavittut inatsisikkut aalajangersagaanngitsutut atuuppoq. Oqartussaasup suliami aalajangiinnginnerani paasissutissat oqartussaasup suliami pineqartumi aalajangiinissaanut pisariaqartut pissarsiarinissaat imaluunniit inuit ataasiakkaat/namminersortut, pingaartumik suliami illua'tungiusut suliap paasissutissartalersorneqarnerani taamaalillutillu suliap naammattumik paasissutissartalersorneqarnerani peqataatinneqarnissaat ingerlatsinermi oqartussaasut ataasiakkaat pisussaaffigaat, pisariaqarpat oqartussaasut allat suleqatigalugit. Ingerlatsineq pillugu inatsiseqartitsinermi aalajangiisuusumik tunngavik taanna oqartussaasut paasissutissanik aalajangiinissaminut pisariaqartunik pissarsinermikkut naammattunik tunngavissaqartussaanerannik imaluunniit misissuisimasussaataanermik taaneqartarpoq.

Namminersorlutik Oqartussat "Suliassat sularineqartarnerat pillugu inatsit pillugu ilitersuut"-mi (Kalaallit Nunaanni Namminersorerullutik Oqartussat Inatsisileriffianni 1994-imi decemberimi sularineqartumi) oqartussaasut paasissutissanik aalajangiinissaminut pisariaqartunik pissarsinermikkut naammattunik tunngavissaqartussaanerat pillugu oqaatigineqartunit ilaatigut immikkoortumi 198-imit erserpoq suliaq oqartussaasumit pisariaqarnera tamakkerlugu misissuiffiqineqassasoq, pisuni ataasiakkaani illersorneqarsinnaasumik aalajangiisoqarsinnaaqqullugu.

Paasissutissat suut oqartussaasup suliami eqqortumik aalajangiissaguni pissarsiarissanerai apeqqummi suliaq pineqartoq aalajangiisuusaaq, tak. Karsten Revsbechip allallu atuakkiaanni “Forvaltningsret – sagsbehandling”-imi 2014-imeersumi quppernerit 145 tulluulu.

Oqartussaasut paasissutissanik aalajangiinissaminnut pisariaqartunik pissarsinermikkut naammattunik tunngavissaqartussaanerisa manna nassataraat, tassalu oqartussaasoq pisussaaffeqartoq ilaatigut oqartussaasup paasissutissanik suliami pineqartumi illersorneqarsinnaasumik aalajangiissaguni pisariaqartunik peqarnissaa qulakkiissallugu, ilaatigullu paasissutissat taakkua eqqortuunerat qulakkiissallugu.

Ingerlatsinermi oqartussaasup paasissutissat pisariaqartut pilertornerpaamik pissusissamisoornerpaanillu/naleqqunnerpaamillu periaaseqarluni pissarsiarineqarnissaat isumagissallugu aammattaq pisussaaffigaa. Taamaalilluni suliaq oqartussaasumit pisariaqarnera tamakkerlugu misissuiffigineqassaaq, pisuni ataasiakkaani illersorneqarsinnaasumik aalajangiisoqarsinnaaqqullugu. Misisuinerup qanoq annertutiginnissaanik naliliiniarnermi isiginiagassat arlallit ilaapput. Tigussaasutigut eqqortumik aalajangiinerup anguneqarnissaata isiginiarneqarnerata saniatigut kinguarsaanani aalajangiisoqarnissaata isiginiarneqarnera pingaaruteqartumik inissisimavoq. Pissusiviusoq pingaaruteqartoq nalornissutigineqarpat nalornissutigineqartup taassuma qulaajarniarneqarnera suliap sukumiisumik paasissutissartalersorneqarnerani ilaavoq.

Oqartussaasup misissuinermini paasissutissanik sunik pissarsiniartussaanerani apeqqummi inatsiseqartitsinikkut tunngavigisaq aalajangiinermi tunngavigineqartussa qullertut aalajangiisuusaaq.

2.2. Kommunip suliamik paasissutissartalersuineri

P-p angerlartinneqarnissaanik inassuteqaat 13. januar 2016-imeersoq K1 Kommunimi isumaginninnermi ataatsimiititaliap siullittaasuata akueraa. Isumaginninnermi nalunaarussiaq 7. januar 2016-imeersoq inassuteqaammut ilanngunneqarsimavoq.

Tamanna imatut paasivara K1 Kommunip angerlartitsinissamik aalajangiineranut manna tunuliaqutaasoq, tassalu kommunip paasinninnera unaasoq A aamma B-kkut P-imut angajoqqaarsiatut suliassamik isumaginninnissamut naleqqukkunnaartut. Tamanna aamma imatut paasivara kommunip tamatumunnga peqatigitillugu paasinninnera unaasoq pissutsinik P-p angerlarsimaffiup a-

vataani inissisimaannarnissaanut tunngavilersuutaasinnaasunik M-imi P-imilu piusoqanngitsoq, matumani pissutsit angerlartitsinerup P-p isumagineqarnisamik ineriartornissamillu pisariaqartitaanut assortuuttutut ulorianaateqarsinnaanera ilanngullugit eqqarsaatigalugu.

Angajoqqaarsiat pillugit paasissutissat isumaginninnermi nalunaarusiamit erisertut ilaatigut tassaapput paasissutissat K1 Kommunip M-imit pissarsiarisimasai. Kommuni paasissutissanik arlalinnik angajoqqaarsiat P pillugu piffissami 2014-imi oktoberimit 2015-imut ingerlasumi ukiumoortumik nalunaarusiaannit aamma pissarsisimavoq.

M-ip oqaaseqaatigisai K1 Kommunimi isumaginninnermik ingerlatsiviup isumaginninnermi ataatsimiititaliap siulittaasuanut inassuteqaammi 13. januar 2016-imeersumi oqaatigisimavai. Taamaaliortoqarsimavoq M-ip angajoqqaarsiat P-imik isumaginninnerat pillugu isumakuluutigisai soorlu K2 Kommunip angajoqqaarsianut misissuiartorluni pulaarnissaata utaqqimaarneratigut qulaa-jaqqaarnagit. Taamatuttaaq inassuteqaat isumaginninnermi ingerlatsiviup saqqummiussimavaa, P-p meeqqerivianit paasissutissat K1 Kommunip e-mailikut 8. januar 2016-imeersukkut K2 Kommunimut pissarsiariniaqqusimasai utaqqimaqqaaarnagit. M-ip angajoqqaarsiat P-imut aningaasanik nassuissisanginnerannik oqarsimanera isumaginninnermik ingerlatsiviup isumaginninnermi ataatsimiititaliamut inassuteqaammi 13. januar 2016-imeersumi aammattaq ilanngullugu oqaatigaa, angajoqqaarsiat P-p anaavimminiinnerani aningaasanik nassuissisarnissaannut tunngavissaqarnersoq ingerlatsivik naliisimangikkaluartoq. Tamatumunnga atatillugu oqaatigaara angajoqqaarsiat meeqqamik paarsaqarnermut atatillugu paaqqinninneriutinik imaluunniit nerisassarsiutissanik, kaasarfimmiussanik atisassarsiutissanillu sukkulluunniit tigusaqartarsimanginnerat isumaginninnermik ingerlatsiviup inassuteqaammik suliarinninnermi nalaani ilisimasimagaa.

Paasissutissat ilmuussusiat angerlartitsinissamik inassuteqaatip isumaginninnermi ataatsimiititaliap siulittaasuanut saqqummiunneqannginnerani isumaginninnermik ingerlatsiviup misissorsimangilaa.

P-p angerlartinneqarnissaanik isumaginninnermi ataatsimiititaliap siulittaasuaata aalajangiinera isumaginninnermi ataatsimiititaliap 11. februar 2016-imi akueraa.

K2 Kommunip angajoqqaarsianut misissuiartorluni 8. januar 2016-imi pulaarsimanera K1 Kommunimi isumaginninnermik ingerlatsiviup piffissami tassani

ilisimasimavaa. Tamanna pillugu nalunaarussiaq K2 Kommunip K1 Kommunimut e-mailikkut 14. januar 2016-imeersukkut nassiussimavaa. K2 Kommunip nalunaarussiaa M-ip angajoqqaarsiat pillugit naammagittaalliutaa pillugu oqaaseqaatinik ilaatigut imaqarpoq. Aamma erserpoq nalunaarussiaq 7. januar 2016-imeersoq K1 Kommunimi isumaginninnermi ingerlatsiviup suliarisimassaa “illuinnaasiorpallaartoq”, “angerlartitsineq meeqqamut, angajoqqaarsianut anaavianullu pitsaanerpaamik angusaqarfiussappat angerlartitsinerup sukumiisumik pilersaarusiorneqarnissaa kissaatiginartoq” kiisalu meeraq pillugu paasissutissanik meeqqap meeqqerivianit pissarsiniartoqarnissaata pingaaruteqarnera K2 Kommunip oqaatigisimagai.

Taamaalilluni K2 Kommunip nalunaarussiaa aamma K1 Kommunip isumaginninnermi nalunaarussiaa pillugu K2 Kommunip oqaaseqaatai kiisalu P-p angerlartinneqarnissaata pilersaarusiorneqarnera K1 Kommunip ilisimasimavai, paasissutissalli tamakku P-p angerlartinneqarnissaanik inassuteqaammut atattillugu isumaginninnermi ataatsimiititaliamut paasissutissiissutiginagit.

Taamaalilluni K1 Kommunip suliaq oqartussaasut paasissutissanik aalajangiinissaminut pisariaqartunik pissarsinermikkut naammattunik tunngavissaqartussaannerat tunngavigalugu amigartumik paasissutissartalersorsimavaa.

Tamanna isorisarialerujussuartut isigaara.

3. Oqaaseqaatinik pissarsiniarnissamik piunasaqaat

3.1. Meeqqat inuusuttullu pillugit peqqussummi § 28, imm. 1

Meeqqat inuusuttullu pillugit peqqusutikkut aalajangersarneqarpoq angajoqqaarsiat oqaaseqaataat kommunip inissiisup meeraq ilaqutariinni paarsatut inissinneqarsimanerata taamaatinneqarnissaanik aalajangiinnginnermini pissarsiariniassagaa. Meeraq kommunip najugarivitami avataani inissinneqarsimappat kommunip uninngavigisap oqaaseqaataa kommunip taamatutaaq pissarsiariniassavaa.

Meeqqat inuusuttullu pillugit peqqussummi § 28, imm. 1 imaattunik oqaasertaqarpoq:

“Ilaqutariinni inissiinerup taamaatinnissaa aalajangiunneqartinnagu ilaqutariit paarsisut oqaaseqaateqartinneqassapput. Meeraq kommunerivitami avataani ilaqutariinut inissinneqarsimappat meeqqap kommuni uninngavigisaa oqaaseqaateqartinneqassaaq.”

Taamaalilluni angajoqqaarsiat kommunillu uninngavigisap oqaaseqaataannik pissarsiniartoqarnissaa inatsisikkut piumasaqaataavoq.

Meeqqat inuusuttullu pillugit peqqussummi § 28 pillugu oqaaseqaatinit makku ilaatigut erserput:

“Meeqqap angerlartinneqannginnerani ilaqutariit paarsisartut aamma ulloq unnuarlu paaqqinniffiup tusarniarneqarnissaannik imm. 1-imi aamma 2-mi aalajangersakkat qularnaarisuussapput. Ilaqutariit paarsisartut/ulloq unnuarlu paaqqinniffik suliamut attuumassuteqartuunngillat taamaattumik tusarniarneqarnissaat qularnaarniarlugu ersarissumik tunngavissaliinissaq pisariaqarpoq.

Ilaqutariit paarsisartut kommunimi allami najugaqartuuppata kommuni taanna aamma tusarniarneqassaaq, taakkua ilaqutariinnut nakkutiginnittuummata taamaattumillu suliami paasissutisseeqataasinnaallutik immaqalu ilaqutariinnit paarsisartunit paasissutissat pissarsiarineqartut eqqortuunerarsinnaallugit/eqqortuunnginnerarsinnaallugit.”

Taamani Ilaqutariinnermut Naalakkersuisoqarfiusup meeqqanik inuusuttunillu ikiorsiisarneq pillugu peqqussut pillugu ilitsersuut december 2001-imeersoq suliarisimavaa. Immikkoortumit 14.4-mit, “Angerlartitsinnginnermi”-mut tunngasumit makku ilaatigut erserput:

“Kommunalbestyrelsi inissiinerni tamani angerlartitsinissaq qaammatinik arfinilini sioqqullugu inissiiviusumit (ilaqutariinnit nalinginnaasumik paarisqaartunit, ilaqutariinnit inuussutissarsiutigalugu paarsisartunit imaluunniit ulloq unnuarlu paaqqinniffimmit) oqaaseqaammik piniartassaaq, kiisalu angerlartitsinerup ingerlariaq-qitsitsinerullu qanoq pinissaat eqqarsaatigalugu iliuusissanut pilersaarut suliarissallugu aaqqiivigissalluguluunniit.

Meeraq inuusuttorluunniit angerlarsimaffiup avataanut ukiut arlerlugit inissinneqarsimappat angerlartitsinissap sapinngisamik qajassuartumik pinissaa isumagineqassaaq.”

Angerlarsimaffiup avataanut inissiineq angajoqqaatut oqartussaassuseqarnermik tigummiartaqtoq akuersisillugu pisimappat angajoqqaatut oqartussaassuseqarnermik tigummiartaqtoq akuersinini qaqugukkulluunniit tunuartissinnaavaa. Kommunalbestyrelsi tamatuma kingornatigut meeraq angerlartinneqassasoq imaluunniit angerlartitsineq meeqqap pisariaqartitaanut ineriartorneranulluunniit assortuuttuuppat angerlartitsisoqassanngitsoq aalajangiissaaq, tak. meeqqat inuusuttullu pillugit peqqussummi § 29.

3.2. Kommuniq oqaaseqaatinik pissarsiniarsimannginnera

P ilaqutariinni inissinneqarsimanera taamaatinneqassasoq aalajangiinninnermini angajoqqaarsiat oqaaseqaataat kommunillu uninngavigisap oqaaseqaataa K1 Kommuniq pissarsiariniarsimasussaagaluarpai. Oqaatigaara tamanna isumaginninnermik ingerlatsiviup angerlartitsinissamik isumaginninnermi ataatsimiititaliap siulittaasuanut inassuteqaataani malugeqqullugu oqaatigineqarsimannitsoq.

Siuliani immikkoortumit 3.1-imit ersertutut inatsisiliortut, angajoqqaarsiat meerarsiaq eqqarsaatigalugu suliame illua'tungiusutut inissisimanninnerat innersuussutigalugu, meeqqat inuusuttullu pillugit peqqussummi § 28, imm. 1 akuerisimavaat, kommunip meeqqanik angerlartitsinissaq pillugu aalajangiinninnerani angajoqqaarsiat tusarniaavigineqartarnissaat qulakkeerniarlugu. Kommuni najugarivitaq kommunip uninngavigisap oqaaseqaataanik pissarsiniarnissaminut pisussaaffeqarpoq, oqaaseqaallu taanna suliamek paasissutis-sartalersuinnermi ilaasussaavoq, tassami kommuni uninngavigisap tassaammat angajoqqaarsianik nakkutilliisuusoq, matumani angajoqqaarsiat suliassaminnik qanoq isumaginninnerannik nakkutilliineq ilanngullugu eqqarsaatigalugu.

K1 Kommuniq angajoqqaarsianit oqaaseqaammik pissarsiniarsimannginnera eqqarsaatigalugu isumaqarpunga angajoqqaarsiat piffissami oktober 2014-imit oktober 2015-imut nalunaarusiaata angajoqqaarsiat oqaaseqaataannik K1 Kommuniq inatsisikkut piunasaqaataasutut pissarsiniarnissamut pisussaaffia taarsersinnaanngikkaa.

K1 Kommuniq P-p ilaqutariinni paarsatut inissinneqarsimanerata taamaatinneqarnissaanik aalajangiinninnermini angajoqqaarsiat kommunillu uninngavigisap, K2 Kommuniq, oqaaseqaataat meeqqat inuusuttullu pillugit peqqussummi § 28, imm. 1 tunngavigalugu pissarsiariniarsimanngilai.

Tamanna isorisarialerujussuartut isigaara.

4. Angajoqqaarsianik ilisimatitsineq

Ilaqutariit meeqqamik paarsaqalersinnaanertik sioqqullugu meeqqap pineqartup paarsarinissaanut kommunimit najugarivitaminnit paarsaqarnissamut allakkatigut akuersissummik tunineqarsimassapput, tak. meeqqat inuusuttullu pillugit peqqussummi § 17, imm. 1 aamma imm. 3.

Angajoqqaarsiat sulinerminni atugassaat akissarsiassaallu paarsaqarnissamik kommunimut isumaqatigiissutikkut tamatuma saniatigut aalajangersarneqas-sapput, tak. meeqqat inuusuttullu pillugit peqqussummi § 21. Paarsaqarnissa-mik isumaqatigiissummi paarsaqarnermut tunngasut pillugit piumasaqaatit a-ngajoqqaarsiat kommunillu isumaqatigiissutigisimasaat aammattaaq takune-qarsinnaassapput, tak. meeqqanik inuusuttunillu ikiorsiisarneq pillugu nalu-naarummi nr. 32-mi, 14. december 2006-imeersumi § 17-imi oqaaseqatigiit si-ulliit.

Meerarsiap angerlartinneqarnissaanik kommunip aalajangiinerata angajoq-qaarsianut nalunaarutigineqarnissaa inatsisikkut piumasaqaataannilaq. Tassa-ni aamma ilaavoq angajoqqaarsiat suliami angerlartitsinermut tunngasumi su-liami illua'tungiunnginnerat, tamannalu immikkoortumi 3-mi aamma oqaati-gineqartutut matumunnga tunngaviuvoq, tassalu kommuni ilaqutariinni inisi-siineq taamaatinneqassasoq aalajangiinnginnermini angajoqqaarsianik immik-kut oqaaseqaateqartitsinissaminut inatsisikkut pisussaaffilerneqarsimasoq.

Taamaalilluni kommunip angajoqqaarsiallu isumaqatigissutigisaasa nassatari-sinnaasaasa saniatigut kommunip angerlartitsinissamik aalajangiinermi anga-joqqaarsianut ilisimatitsissutiginnissaanut inatsiseqartitsinikkut pisussaaffeqar-neranik piosoqanngilaq.

Ungali paasinninnera unaavoq kommunip angerlartitsinissamik aalajangiinini angajoqqaarsianut ingerlatsinermi ileqqorissaarneq tunngavigalugu sapinni-gsamillu angerlartitsineq sioqqulluarlugu ilisimatitsissutigisariaqaraa, angajoq-qaarsiat tamatumunnga naleqqussarnissaminut piffissaqartinneqarsinnaaq-qullugit.

A aamma B-kkut paarsaqarnissamut akuersisummik kommunimit najugarivi-taminnit, K2 Kommunimit, 16. februar 2011-mi tunineqarsimapput. Tamatuma saniatigut angajoqqaarsiat aamma K2 Kommuni imaluunniit angajoqqaarsiat aamma K1 Kommuni paarsaqarnermut tunngasuni piumasaqaataasut pillugit arlaatigut isumaqatigiissuteqarsimangillat. Taamaalilluni paarsaqarnerup taa-maatinneqarnissaanut piffissaliussa q pillugu isumaqatigiissummik suliami pe-qanngilaq.

Iliusissanut pilersaarutip 19. oktober 2016-imi suliarineqarnerata kingornati-gut P-p angerlartinneqarnissaa anguniarlugu K1 Kommuni sulisimavoq. Ta-manna K2 Kommunip angajoqqaarsianut aqaguani ilisimatitsissutigisimavaa.

P-p anaanaviusullu M-ip qaninnerusumik attaveqatigiinnerat pilersinniarlugu sulinermut ilaatillugu K1 Kommuni aalajangiivoq P M-imi 28.december 2015-imit 8. januar 2016-imut feriassasoq. M-illi angajoqqaarsiat P-imik isumaginninnerat pillugu naammagittaalliutaat pissutigalugu P angajoqqaarsianut pilersaarutaasutut utertussaagaluarluni utinngilaq.

Suliap ingerlasimanerata allaaserineqarnerani takuneqarsinnaasutut P-p angerlartinneqarnissaanik inassuteqaat isumaginninnermi ataatsimiititaliap siulittaasuata 13. januar 2016-imi akueraa. Tamanna isumaginninnermik ingerlatsiviup 19. januar 2016-imi paasivaa. Ulloq taanna K1 Kommunip anaanaviusoq M sianerfigalugu tamatuminnga ilisimatippaa. K1 Kommunip suliame illoq taanna allattuiffianit erserpoq P-p M-imiinnissaa aalajangiusimaneqartoq, P-illu M peqatigalugu angajoqqaarsianik illoqarfimmut K2-mittumut inuulluaqqusiar-tortinneqarnissaanut periarfissaqartoq.

K1 Kommunimi isumaginninnermik ingerlatsiviup K2 Kommuni oqarasuaatikkut 22. januar 2016-imi ataatsimeeqateqatigaa, tassanilu K2 Kommuni isumaginninnermi ataatsimiititaliap siulittaasuata aalajangiineranik ilisimatinneqarpoq.

K1 Kommuni oqarasuaatikkut ataatsimiinneq taanna 22. januar 2016-imi ingerlanneqartoq pillugu imaqarniliorsimanngilaq. Suliamili allattuiffik suliame allagaatinut K1 Kommunimit tigusannut ilaavoq, taamatuttaarlu ataatsimiinneq pillugu imaqarniliaq naatsoq suliame allattuiffimmit suliame allagaatinut K2 Kommunimit tigusannut ilaasumit erserpoq. Ataatsimiinneq taanna pillugu imaqarniliaq suliareqqullugu K2 Kommunip kaammattuutigaluaraa K1 Kommunip imaqarniliaq taamaattoq suliarsimanngilaa.

K1 Kommunip aamma K2 Kommunip 22. januar 2016-imi ataatsimiinneq pillugu suliani allattuiffiisa imminnut sanilliunneranni takuneqarsinnaavoq K1 Kommunip ataatsimiinnermi sunik ilisimatitsissuteqarnera kommunit assigiinngitsumik paasisimagaat. Taamaalilluni K1 Kommunip suliame allattuiffianit erserpoq isumaginninnermi ataatsimiititaliap siulittaasuata angerlartitsinissaq pillugu aalajangiinera innersuussutigalugu siunnersuutigineqartoq P M-ilu peqatigiillutik illoqarfimmut K2-miittuliassasut angajoqqaarsiat inuulluaqqujartorlugit. P-p angajoqqaarsiat inuulluaqqujartorlugit illoqarfimmut K2-miittuliarnissaata saniatigut K2 Kommunip oqarasuaatikkut ataatsimiinneq pillugu suliame allattuiffianit erserpoq P-p illoqarfimmi K2-miittumi ulluunerani paaqqinniffimmi inaa ammatinneqassasoq, angerlartitsinerlu påskimut aasamulluunniit pissanersoq naliliisoqassasoq.

K2 Kommuni angajoqqaarsianut kommunitut najugarivitaagami tassaavoq K1 Kommunip aalajangiinerinik angajoqqaarsianut ingerlatitseqqilluni ilisimatitsisussaq. Oqarasuaatikkulli ataatsimiinnermi paasisutissat K1 Kommunip ilisimatitsissutigisaatut saqqummertut K2 Kommunip paasinninnini tunngavigalugu angajoqqaarsianut ingerlateqqillugit ilisimatitsissutigisimavai.

Taamaattumik angajoqqaarsiat kukkullutik isumaqarsimapput P imminnut utissasoq, angerlartitsinissarlu tamatuma kingornatigut pilersaarusioneqassasoq. Paasinninneq taanna K2 Kommunip angajoqqaarsianut e-mailiatigut 4. februar 2016-imeersukkut aatsaat naqqinneqarpoq, K2 Kommunip K1 Kommunimik oqarasuaatikkut ulloq taanna ataatsimeeqateqarnerani P-p M peqatigalugu illoqarfimmut K2-miittumut 15. februar 2016-imi tikinnissaanik tike-raaginnarnissaanillu ilisimatinneqarnerata kingornatigut.

P-p angerlartinneqarnissaanik isumaginninnermi ataatsimiititaliap siulittaasua-ta aalajangiinerata kingornatigut ullut pingasut qaangiunneranni K1 Kommunip K2 Kommunimut ilisimatitsisimanera ingerlatsinnermi ileqqorissaarnermut naapertuuttutut isigaara.

K1 Kommunilli 22. januar 2016-imi ataatsimiinneq pillugu ingerlatsinnermi ileqqorissaarneq tunngavigalugu imaqarniliorsimannginnera ajuusaarnartutut isigaara.

Angerlartitsinissamik aalajangiineq K1 Kommunip K2 Kommunip K1 Kommunimut kaammattuutigisaatut allakkatigut imaluunniit ataatsimiinneq pillugu imaqarniliamik nassiussinnermigut nalunaarutigisimasuuppagu K1 Kommunip P-mik angerlartitsinissaq pillugu aalajangiinera K2 Kommunip angajoqqaarsianut ingerlaannaq eqqortumillu ilisimatitsissutigisinnaasimassagaluarpa.

5. Eqikkaaneq

K1 Kommunip P-p angerlartinneqarnissaanik aalajangiinnginnermini suliamik oqartussaasut paasisutissanik pisariaqartunik pissarsinnermikkut naammattunik tunngavissaqarnissaannik piumasaqaat tunngavigalugu naammattunik paasisutissartalersuisimannginnera isorisarialerujussuartut isigaara.

K1 Kommunip P angerlartinneqassasoq aalajangiinnginnermini meeqqat inuuttullu pillugit peqqussummi § 28, imm. 1 tunngavigalugu piumasaqaatigineqartut tulleriinneri malillugit angajoqqaarsianik kommunimillu uninngavigsamik oqaaseqaateqartitsisimannginnera taamatuttaarlu isumaginninnermik i-

ngerlatsiviup angerlartitsisoqarnissaanik isumaginninnermi ataatsimiititaliap siulittaasuanut inassuteqaammi taamatut pisussaaffeqarnermik maluginneqqusisimanginnera aamma isorisarialerujussuartut isigaakka.

P-p angerlartinneqarnissaanik aalajangiinnerminik K1 Kommunip anaanaviusumut ilisimatitsissuteqarnermi kingornatigut ullut pingasut qaangiunneranni K2 Kommunimut ilisimatitsisimanera ingerlatsinnermi ileqqorissaarnermut naapertuuttutut isigaara.

K1 Kommunilli ingerlatsinnermi ileqqorissaarneq naapertorlugu 22. januar 2016-imi ataatsimiinneq pillugu imaqarniliorsimanginnera ajuusaarnartutut isigaara.

K1 Kommuni qinnuigaara oqaaseqaatima kommuni sunik isumaliutersuuteqarnissaanut pissutissaqalersinneraa uannut nalunaarutigeqqullugu, matumani suliat siunissami angerlartitsinnernut tunngasut ilanngullugit eqqarsaatigalugit.”

K1 Kommunip e-mailikkut 17. maj 2017-imeersukkut nalunaarfigaanga oqaaseqaatiga kommunip tusaatissatut tigugaa.

Suliamik suliarinninnera tamatuma kingornatigut unitsippara.